



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 410
fax. +387 33 726 423
e – mail: info@voda.ba

Broj: **UP-1/21-1-40-162-9/26**
Datum: **11.06.2026. godine**

«Agencija za vodno područje rijeke Save» Sarajevo rješavajući po zahtjevu investitora OR „MESNICA BRAJLOVIĆ” vl. Brajlović Ibro za izdavanje prethodne vodne saglasnosti za ispuštanje tehnoloških otpadnih voda sa lokacije poslovnog objekta namjene - klaonica krupne stoke i prerada mesa sa pratećim sadržajima, koja se planira graditi u naselju Mrđelići, općina Foča, na osnovu člana 139. stav (1) tačka 3. Zakona o vodama («Službene novine Federacije BiH, broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi:

R J E Š E N J E **o prethodnoj vodnoj saglasnosti**

1. Investitoru OR „MESNICA BRAJLOVIĆ” vl. Brajlović Ibro daje se prethodna vodna saglasnost za ispuštanje tehnoloških otpadnih voda sa lokacije poslovnog objekta namjene - klaonica i prerada mesa sa pratećim sadržajima, koja se planira graditi u mesa u naselju Mrđelići, općina Foča, kapaciteta 2 grla krupne stoke sedmično, na zemljištu označenom kao k.č. broj: 1101/1, KO Njuhe, a u postupku pribavljanja urbanističke saglasnosti za izgradnju objekta.
2. Prethodna vodna saglasnost može se koristiti isključivo za potrebe izdavanja okolinske dozvole, urbanističke saglasnosti ukoliko nije potrebna okolinska dozvola i u postupku izdavanja koncesije na vodama i vodnom dobru ukoliko je isto predviđeno zakonom o koncesijama.
3. Prethodna vodna saglasnost daje se na osnovu pregleda dostavljene dokumentacije i pod sljedećim uslovima:
 - 3.1. Izraditi investiciono tehničku dokumentaciju potrebnu za pribavljanje vodne saglasnosti za ispuštanje tehnoloških otpadnih voda sa lokacije poslovnog objekta namjene - klaonica i prerada mesa sa pratećim sadržajima, koja se planira graditi u mesa u naselju Mrđelići, općina Foča, kapaciteta 2 grla krupne stoke u sedmici.

Investiciono-tehnička dokumentacija treba biti urađena od strane pravnog lica koje ima ovlaštenje (lista «A») pribavljeno od strane Federalnog ministarstva poljoprivrede, vodoprivrede i šumarstva koja treba da obradi sva pitanja definisana članom 5. stav (2) Pravilnika o sadržaju, obliku, uslovima, načinu izdavanja i čuvanja vodnih akata («Službene novine F BiH», broj: 31/15, 55/19 i 41/20) koja su bitna za konkretan slučaj, a naročito:

 - Na osnovu proračuna količina vode, potrebnih za nesmetan rad predmetnog objekta (potrebne količine sanitarne vode, potrebne količine vode u postupku klanja te za pranje opreme i prostora), obraditi tehničko rješenje zahvatanja vode, monitoringa količina zahvaćene vode i dovođenja vode do objekta, sa svim potrebnim grafičkim priložima i tehničkim opisom.
 - Na osnovu kapaciteta, proračunati količinu otpadnih voda od klanja i prerade mesa, pranja prostora i opreme te obraditi tehničko rješenje za tretman istih sa svim potrebnim proračunima, grafičkim priložima i tehničkim opisom.
 - Projektnom dokumentacijom predvidjeti okno iza uređaja za tretman tehnoloških otpadnih voda i prije miješanja sa bilo kojim vodama na lokaciji, u kojem će se vršiti monitoring prečišćenih otpadnih voda, a prije ispuštanja u definisani recipijent.
 - Tehničko rješenje za monitoring i način monitoringa prečišćenih otpadnih voda.
 - Na predmetnom lokalitetu nije dozvoljeno indirektno ispuštanje otpadnih voda u podzemne vode ili na tlo.
 - U projektnoj dokumentaciji obraditi postupak odvajanja krvi prilikom iskrvavljenja, sistemom odvojenog prikupljanja u posebne posude od inoksa.

- Na preglednoj situaciji prikazati cjelokupan lokalitet sa planiranim objektima (poslovni objekat, manipulativni i parking prostor, uređaj za tretman tehnoloških otpadnih voda i dr.), liniju utvrđenog vodnog dobra, priobalni pojas, te definisati udaljenost planiranih objekata od istih.
 - Projektnom dokumentacijom predvidjeti način i mjesto privremenog i konačnog zbrinjavanja otpada od klanja i drugih nusproizvoda, u skladu sa Zakonom o veterinarstvu i Pravilnikom o načinu postupanja sa životinjskim lešinama i otpadom životinjskog porijekla i propisima iz oblasti zaštite okoliša.
 - Projektnom dokumentacijom sagledati sve moguće neželjene uticaje kako na planirani objekat, tako planiranog objekta na druge objekte i postrojenja, stečena prava korisnika, postojeću infrastrukturu, naselja i sl. i dati prijedlog mjera za uklanjanje odnosno ublažavanje tih utjecaja.
- 3.2. Usvojenim sistemom prečišćavanja tehnoloških otpadnih voda mora se obezbjediti kvalitet efluenta u skladu sa propisanim graničnim vrijednostima emisije u prečišćenoj vodi, propisane u članu 15. Prilog 8. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 1/24).
 - 3.3. Predmetni objekat ne smije biti u koliziji sa površinskim vodama (unutar granica vodnog dobra i u plavnom području), niti se smije nalaziti u priobalnom pojasu i zaštitnim zonama izvorišta vode za piće.
 - 3.4. Pri izradi tehničke dokumentacije pridržavati se uslova iz Urbanističke saglasnosti, zakonske regulative vezane za ovakvu vrstu radova, ekološko-ekonomskih zahtjeva te pravila struke.
 - 3.5. Investiciono tehnička dokumentacija mora biti urađena na nivou projekta za pribavljanje odobrenja za građenje te u skladu sa uslovima iz ove prethodne vodne saglasnosti i uslovima ostalih nadležnih organa ukoliko nisu u suprotnosti sa uslovima iz ovog Rješenja.
4. Nakon ishodovanja Rješenja o urbanističkoj saglasnosti od nadležnih službi, potrebno je podnijeti zahtjev za donošenje Rješenja o vodnoj saglasnosti na projektnu dokumentaciju. Pored investiciono – tehničke dokumentacije urađene u skladu sa uslovima datim u dispozitivima ovog Rješenja, investitor treba dostaviti i dokumentaciju navedenu u skladu sa članom 8. i 19. Pravilnika o sadržaju, obliku, uslovima, načinu izdavanja i čuvanja vodnih akata.
 5. Ovo Rješenje o prethodnoj vodnoj saglasnosti Investitor će koristiti u postupku dobijanja urbanističke saglasnosti i ona definiše sve uslove koje projektna dokumentacija treba ispuniti sa aspekta voda u skladu sa Zakonom o vodama.
 6. Prethodna vodna saglasnost se daje sa rokom važenja od tri (3) godine od dana pravosnažnosti ovog rješenja, u kojem roku se podnosilac zahtjeva treba obratiti za izdavanje vodne saglasnosti, u skladu sa članom 111. stav 3. Zakona o vodama.
 7. Ukoliko nakon izdavanja ove prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavijestiti ovu Agenciju, odnosno kantonalno ministarstvo, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.
 8. Ova prethodna vodna saglasnost se može izmjeniti ukoliko nastupe razlozi utvrđeni u članu 130. stav 1. tačka (1)., (2)., (3). ili (4). Zakona o vodama («Službene novine Federacije BiH», broj 70/06), a zainteresirane stranke podnesu argumentiran zahtjev za izmjenu ovog vodnog akta

Obrazloženje

Investitor OR „MESNICA BRAJLOVIĆ“ vl. Brajlović Ibro, zahtjevom bez broja od 15.04.2026. godine, obratio se ovoj Agenciji za izdavanje prethodne vodne saglasnosti za ispuštanje tehnoloških otpadnih voda sa lokacije poslovnog objekta namjene - klaonica i prerada mesa sa pratećim sadržajima, koja se planira graditi u mesu u naselju Mrđelići, općina Foča, kapaciteta 2 grla krupne stoke sedmično, na zemljištu označenom kao k.č. broj: 1101/1, KO Njuhe, a u postupku pribavljanja urbanističke saglasnosti za izgradnju objekta.

U provedenom postupku dostavljena je i pregledana sljedeća dokumentacija:

A. Opšta dokumentacija

- Uplatnica za upravnu taksu u iznosu od 80.00 KM,
- Ovjerena kopija lične karte Brajlović Ibro,
- Zemljišno-knjižni izvadak ZK uložak 606 broj: 045-0-NAR-26-001197 od 15.04.2026. godine Općinski sud u Goraždu,
- Kopija katastarskog plana broj: 05-5-26-119/2026-2 od 14.05.2026. godine izdata od strane Službe za prostorno uređenje, komunalne, geodetske, katastarske i stambene poslove, imovinsko-pravna pitanja i boračko-invalidsku zaštitu, Općina Foča,
- Mišljenje broj: 09-19-134-3/26 od 18.03.2026 godine izdato od strane Službe za prostorno uređenje, komunalne, geodetske, katastarske i stambene poslove, imovinsko-pravna pitanja i boračko-invalidsku zaštitu, Općina Foča,
- Obavještenje o razvrstavanju poslovnog subjekta prema kvalifikaciji djelatnosti broj: 07-28-5-1248/24 od 05.02.2024 godine izdato od strane Službe za statistiku za područje Bosansko-podrinjskog Kantona, Goražde,
- Rješenje o obavljanju obrta broj: UP-1:05-8-17-13-1/24 od 26.01.2024. godine, Općinski načelnik, Općina Foča, Ustikolina.

B. Tehnička dokumentacija

Studija za izdavanje prethodne vodne saglasnosti za poslovni objekat - klaonica, investitor Ibro Brajlović, urađena od strane „SENDO“ d.o.o. Sarajevo, maj 2026 godine (2 primjerka).

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama o zahtjevu je dana 22.05.2026. godine obaviještena javnost putem obavještenja na oglasnoj ploči «Agencije za vodno područje rijeke Save» Sarajevo i u dnevnom listu „Oslobođenje“ objavljenom dana 21.05.2026. godine. U datom roku nije bilo pisanih izjašnjenja o planiranim aktivnostima iz zahtjeva. Na osnovu objave, oglašavanja u dnevnom listu „Oslobođenje“ investitor je na osnovu Zaključka o visini i roku za plaćanje posebnih troškova broj: UP-1/21-1-40-162-6/26 od 05.06.2026. godine uplatio iznos po računu broj: 25-3600-000101 (BF 901) dostavljen od O Media d.o.o., za troškove obavještanja javnosti putem oglasa.

Na osnovu uvida u dostavljenu dokumentaciju i Studiju utvrđeno je sljedeće:

Lokacija planiranih objekata klaonice krupne stoke sa pratećim sadržajima nalazi se u naselju Mrđelići, općina Foča, na zemljištu označenom kao k.č. broj: 1101/1, KO Njuhe, Foča. Kapacitet klaonice je dva grla krupne stoke sedmično.

Predmetni objekat je prizemne spratnosti i udaljen je približno 110 m od magistralnog puta. U studiji je navedeno da se objekat ne nalazi u zonama sanitarne zaštite izvorišta vode te da se na lokaciji ne nalaze vodozahvati niti objekti koji mogu biti ugroženi predmetnim objektom.

U neposrednoj blizini objekta ne nalaze se izgrađeni stambeni niti drugi objekti, već je okolno područje obraslo šumom.

U blizini objekta, na udaljenosti cca 8,5 m od objekta, nalazi se povremeni potok.

Tehnološke otpadne vode proizvodnog objekta - klaonice nastaju u procesu klanja te u procesu obrade mesa, spiranjem površina unutar objekta i pranjem opreme koja se koristi u navedenim postupcima. Ove vode će se prikupljati putem rešetki unutar objekta, a potom odvoditi na tretman u taložnik, a zatim na separator - hvatač masti te, preko okna za monitoring ispuštati u recipijent - povremeni potok.

U studiji je navedeno da će se krv prilikom iskrvarenja skupljati posebnim sistemom u vodonepropusne posude i zbrinjavati od strane ovlaštene firme.

Osnovni podaci za izgradnju objekata i sama aktivnost u njima definisana je u Studiji za pribavljanje prethodne vodne saglasnosti za izgradnju poslovnog objekta - klaonica investitora Ibro Brajlović, urađena od strane „SENDO“ d.o.o. Sarajevo, maj 2026 godine.

Snabdijevanje vodom za potrebe predmetnih objekata će biti obezbijeđeno iz javnog vodovodnog sistema.

Na osnovu utvrđenog činjeničnog stanja i dostavljene dokumentacije, a u svrhu smanjenja negativnih uticaja predmetne aktivnosti na stanje voda i prava na vode dodijeljena drugim korisnicima, podnosiocu zahtjeva su ovim vodnim aktom, u tački 3. dispozitiva rješenja, shodno odredbama Zakona o vodama, odredbama Pravilnika o sadržaju, obliku, uslovima, načinu izdavanja i čuvanja vodnih akata i odredbama Uredbe o uslovima ispuštanja otpadnih voda u okoliš i sisteme javne kanalizacije, doneseno je rješenje kao u dispozitivu i propisani uslovi koje je Investitor dužan ispuniti prilikom izrade projektne dokumentacije, a koja će Investitoru biti potrebna u postupku pribavljanja vodne saglasnosti i odobrenja za građenje.

Na osnovu prednjeg i provedenog postupka, a shodno odredbama člana 111. Zakona o vodama i člana 5. Pravilnika o sadržaju, obliku, uslovima, načinu izdavanja i čuvanja vodnih akata, doneseno je rješenje kao u dispozitivu.

Podnosilac zahtjeva je uplatio upravnu i administrativnu taksu u iznosu od 80 KM u skladu sa Zakonom o federalnim upravnim taksama i tarifi federalnih upravnih taksi («Službene novine Federacije BiH», broj 6/98, 8/00, 45/10 i 43/13) te troškove oglašavanja u iznosu 170,24 KM u printanom mediju na nivou FBiH.

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja.

Žalba se podnosi neposredno pismeno, usmeno na zapisnik ili preporučeno putem pošte ovom organu i taksira se sa 15 KM administrativne takse prema tarifnom broju 3. Tarife federalnih administrativnih taksi.

Obradivač akta:

Behija Ahmedić, dipl.inž.tehn.

Po ovlaštenju
Rukovodilac Sektora za izdavanje vodnih akata



Nihad Pezo, dipl.inž.građ.

Dostaviti:

- OR" MESNICA BRAJLOVIĆ" vl. Brajlović Ibro, Omladinska bb, 73250 Foča-Ustilokina (Prilog: Studija 1 primjerak)
- Ⓞ AVP Sava, ISV-vodna knjiga,
- Sektor 40 – arhiva
- Oglasna tabla AVP Sava Sarajevo